



Jadual Pembacaan Khutbah Jumaat

Siri 8/ 2023

(Siri Ogos Tahun 2023)

تاریخ	تاجوق	ب
4 Ogos 2023M/ 17 Muharram 1444H	Kepimpinan: Antara <i>Taklif</i> dan <i>Tasyrif</i>	1.
11 Ogos 2023M/ 24 Muharram 1444H	Istiqamah Berubah Ke Arah Kebaikan	2.
18 Ogos 2023M/ 1 Safar 1444H	Penjagaan Ikhtilat Di Tempat Kerja	3.
25 Ogos 2023M/ 8 Safar 1444H	Benarkah Kita Merdeka?	4.
Khutbah Kedua		

دبیایاے:



زکاة فولاو فینغ

دتریبتکن:



جابتن حال إحوال اکام اسلام فولاو فینغ



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Kepimpinan: Antara *Taklif* dan *Tasyrif*

4 Ogos 2023M/ 17 Muharram 1444H

الْحَمْدُ لِلَّهِ الَّذِي شَرَّفَ عِبَادَهُ الْمُتَّقِينَ، وَكَفَّلَ بِأَدَاءِ الْأَمَانَةِ عَلَى الْمَسْئُولِينَ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، رَبُّ السَّمَوَاتِ السَّبْعِ وَرَبُّ الْأَرْضِينَ،
وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُ اللَّهِ وَرَسُولُهُ، سَيِّدُ الْأَوَّلِينَ وَالْآخِرِينَ، وَقُدُّوهُ
خَلَقَ اللَّهُ أَجْمَعِينَ،
اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ، وَعَلَى آلِهِ وَصَحَابَتِهِ الْمُخْبِتِينَ،
وَالتَّابِعِينَ وَتَابِعِيهِمْ بِإِحْسَانٍ إِلَى يَوْمِ الدِّينِ.
أَمَّا بَعْدُ، فَاتَّقُوا اللَّهَ، عِبَادَ اللَّهِ، بِفِعْلِ مَا أَمَرَ، وَبِاجْتِنَابِ مَا نَهَى عَنْهُ وَزَجَرَ.

SIDANG MUKMININ RAHIMAKUMULLAH,

Bertakwalah kalian kepada Allah **سُبْحَانَهُ وَتَعَالَى** dengan sebenar-benar takwa. Hanya dengan rasa takutkan Allah sahajalah dapat membentuk pemikiran dan tindakan kita selari dengan akidah, syariat dan akhlak Islam.

Sebelum melanjutkan bicara, marilah kita memberikan sepenuh tumpuan kepada isi kandungan khutbah hari ini. Jangan berbual-bual, tidur dengan sengaja, bermain telefon bimbit dan menggerakkan tabung kutipan Jumaat kerana ia bertentangan dengan sunnah serta adab.



Khatib menyeru kepada sidang jemaah sekalian supaya memberi sepenuh tumpuan kepada apa yang khatib ingin sampaikan. Mudah-mudahan pengisian khutbah pada hari ini memberikan impak kepada keimanan, ketakwaan dan kehidupan kita. Mimbar pada minggu ini ingin mengangkat tajuk: **“Kepimpinan: Antara Taklif dan Tasyrif”** untuk kita *tadabbur* bersama, insya-Allah.

SIDANG MUSLIMIN RAHIMAKUMULLAH,

Sudah menjadi *sunnatullah*, manusia di atas muka bumi ini mesti bersosial demi kelangsungan hidup. Dari seorang individu, kepada sebuah keluarga, seterusnya terbentuklah sebuah masyarakat dan negara. Maka, sebuah institusi sosial walaupun sebuah keluarga kecil, pastinya tidak dapat hidup harmoni tanpa adanya kepimpinan yang mentadbir urus segala aspek kehidupan manusia.

Seorang pemimpin mestilah berkemampuan dalam memikul tanggungjawab untuk menggerakkan manusia ke arah matlamat yang ingin dicapai. Tidak kiralah sama ada tanggungjawab dan matlamat itu berkaitan urusan duniawi atau ukhrawi. Begitu juga, tidak terkecuali sama ada institusi yang dipimpin itu merupakan unit sosial yang paling kecil seperti sebuah keluarga sehinggalah kepada kepimpinan sebuah negara. Menjelaskan hakikat ini, Nabi ﷺ menyatakan melalui sabda-Nya:

أَلَا كُلكُمْ رَاعٍ وَكُلكُمْ مَسْئُولٌ عَنْ رَعِيَّتِهِ فَإِلَامَامُ الَّذِي عَلَى النَّاسِ رَاعٍ وَهُوَ مَسْئُولٌ عَنْ رَعِيَّتِهِ وَالرَّجُلُ رَاعٍ عَلَى أَهْلِ بَيْتِهِ وَهُوَ مَسْئُولٌ عَنْ رَعِيَّتِهِ وَالْمَرْأَةُ رَاعِيَةٌ عَلَى

أَهْلُ بَيْتِ زَوْجِهَا وَوَلَدِهِ وَهِيَ مَسْئُولَةٌ عَنْهُمْ وَعَبْدُ الرَّجُلِ رَاعٍ عَلَى مَالِ سَيِّدِهِ وَهُوَ
مَسْئُولٌ عَنْهُ إِلَّا فَكُلُّكُمْ رَاعٍ وَكُلُّكُمْ مَسْئُولٌ عَنْ رَعِيَّتِهِ

Maksudnya: “Ketahuilah kamu sekalian adalah pemimpin dan setiap pemimpin bertanggungjawab atas apa (dan siapa) yang dipimpinnya. Seorang pemimpin yang memimpin rakyat akan bertanggungjawab terhadap rakyatnya. Seorang lelaki adalah pemimpin kepada keluarganya dan dia bertanggungjawab kepada mereka semua. Seorang wanita juga pemimpin kepada keluarganya dan dia bertanggungjawab kepada mereka semua. Seorang wanita adalah pemimpin kepada rumah tangga suaminya dan anak-anaknya dan dia bertanggungjawab terhadap mereka semua. Seorang hamba adalah pemimpin terhadap harta tuannya, dan dia bertanggungjawab kepada harta tersebut. Setiap kamu adalah pemimpin dan bertanggungjawab atas kepemimpinannya.” ﴿Hadis Riwayat Muslim﴾

Hadis Nabi ﷺ ini jelas menunjukkan bahawa kita semua adalah pemimpin. Seseorang tidak dapat memimpin dan melunaskan tanggungjawab dengan cemerlang, melainkan mempunyai iman, takwa, motivasi yang tinggi dan memulakannya dengan memimpin diri sendiri terlebih dahulu.

SIDANG JUMAAT SEKALIAN,

Terlantiknya seorang pemimpin, hendaklah diiringi dengan kemuliaan dan kebertanggungjawaban. Andai seorang pemimpin berjaya melunaskan

tanggungjawabnya dengan cemerlang, maka dia beroleh kemuliaan sama ada dalam kalangan manusia mahupun kemuliaan Allah Azza wajalla.

Sebaliknya jika seorang pemimpin membelakangkan integriti dan lalai dalam melunaskan tanggungjawabnya, maka kemurkaan Allah pasti akan menghantui di samping mendapat penghinaan manusia. Justeru saudaraku sekalian, kepimpinan bukanlah satu yang mudah dan boleh dibuat sambil lewa, ia bukanlah satu kebanggan. Malahan, kepimpinan adalah amanah yang amat berat. Satu hari nanti, setiap apa jua yang pernah diberikan Allah termasuklah kekuasaan dan kepimpinan, pasti dipersoalkan Allah satu persatu. Dalam surah Al-Ahzab ayat 72 Allah berfirman:

إِنَّا عَرَضْنَا الْأَمَانَةَ عَلَى السَّمَوَاتِ وَالْأَرْضِ وَالْجِبَالِ فَأَبَيْنَ أَنْ يَحْمِلْنَهَا وَأَشْفَقْنَ مِنْهَا وَحَمَلَهَا
الْإِنْسَانُ إِنَّهُ كَانَ ظَلُومًا جَهُولًا ﴿٧٢﴾

Maksudnya: “Sesungguhnya Kami telah menawarkan amanah (Kami) kepada langit, bumi dan gunung-ganang (untuk menanggungnya), tetapi semuanya enggan untuk menanggung amanah itu dan mereka khuatir tidak akan dapat menyempurnakannya dan hanya manusia sanggup memikulnya. Sesungguhnya tabiat kebanyakan manusia suka melakukan kezaliman lagi sangat jahil.”

Saidina Abu Bakar رَضِيَ اللَّهُ عَنْهُ merupakan khalifah pertama yang dilantik selepas kewafatan Nabi Muhammad صَلَّى اللَّهُ عَلَيْهِ وَسَلَّمَ. Antara pesanan Saidina Abu Bakar sebagai panduan kepada semua pemimpin:



أَيُّهَا النَّاسُ فَإِنِّي قَدْ وُلِّيتُ عَلَيْكُمْ وَلَسْتُ بِخَيْرِكُمْ فَإِنِ أَحْسَنْتُ فَأَعِينُونِي وَإِنِ
أَسَأْتُ فَقَوِّمُونِي. الصِّدْقُ أَمَانَةٌ وَالْكَذِبُ خِيَانَةٌ

Maksudnya: “Wahai sekalian manusia, sesungguhnya aku telah dipilih untuk memimpin kamu semua, dan aku bukanlah yang terbaik dalam kalangan kamu. Sekiranya aku berbuat baik maka bantulah aku, dan sekiranya aku melakukan kesilapan, maka perbetulkanlah aku. Kebenaran adalah satu amanah dan dusta itu adalah satu pengkhianatan.”

SIDANG MUSLIMIN RAHIMAKUMULLAH,

Para pemimpin bertanggungjawab untuk membentuk modal insan terhadap mereka di bawah kepimpinan masing-masing. Kita juga wajib menjaga kebajikan setiap orang yang dipimpin. Jangan biarkan ada dalam kalangan mereka yang dipimpin teraniaya dan dibiarkan melarat. Lindungilah golongan yang lemah dan tidak berdaya ini.

Sebagai pemimpin, takutlah kepada Allah dan laksana tugas dengan integriti dan jati diri. Bertindaklah dengan tegas tanpa meninggalkan ihsan. Jangan menganiaya sesiapa pun dalam kalangan mereka yang dipimpin. Santunilah mereka secara adil dan saksama. Tunaikanlah hak kepada mereka yang berhak dan curahkan segala idea, tenaga dan wang ringgit dalam melaksanakan amanah yang dipikul. Bertindaklah secara professional dalam setiap urusan serta permudahkannya.

Dalam konteks Malaysia Madani, sifat ihsan ditafsirkan dengan makna peduli dan belas kasihan, iaitu mengasihi orang lain merangkumi ahli

keluarga, sahabat handai, jiran tetangga dan anggota masyarakat secara keseluruhan. Menyelami penderitaan dan kemelaratan orang lain, lalu berusaha untuk mencari jalan bagi mengubatnya adalah ciri pemimpin yang amat kita perlukan. Ketiadaan sifat ihsan akan mengundang pelbagai masalah seperti rasuah, salah guna kuasa dan penyelewengan.

Ingatlah saudaraku sekalian, Nabi ﷺ telah menyenaraikan tujuh golongan yang akan mendapat perlindungan Allah nanti di Mahsyar. Salah satunya adalah pemimpin yang adil. Sabda Baginda ﷺ:

سَبْعَةٌ يُظِلُّهُمْ اللَّهُ فِي ظِلِّهِ يَوْمَ لَا ظِلَّ إِلَّا ظِلُّهُ: الْإِمَامُ الْعَادِلُ...

Maksudnya: “Ada tujuh golongan orang yang dinaungi oleh Allah pada hari tiada naungan selain naungan-Nya, (antaranya) pemimpin yang adil.”

﴿Hadis Riwayat Imam Al Bukhari﴾

SIDANG JEMAAH SEKALIAN,

Sebagai kesimpulan kepada khutbah hari ini khatib ingin mengajak para jemaah memberi perhatian kepada perkara-perkara berikut:

Pertama: Kaum lelaki yang memikul tanggungjawab kepada keluarga, perlu mempersiapkan diri dengan ilmu dan jati diri supaya terus hikmah dalam memimpin dan mendidik isteri serta anak-anak menuju syurga yang tiada bernoktah nikmatnya.

Kedua: Seorang pemimpin di institusi atau universiti, berusaha agar sentiasa menjadi teladan yang baik dalam kalangan rakan-rakan. Tunjukkan kualiti sebagai seorang penuntut, sentiasa menghormati guru, bijak membimbing rakan sebaya dan mampu menjadi personaliti yang dikagumi akhlak dan segala lapangan pencapaiannya.

Ketiga: Pemimpin masyarakat dalam apa jua lapangan, sama ada pemimpin di masjid, jawatankuasa penduduk, ketua jabatan, ahli politik, pemimpin negara dan sebagainya, khatib ingin mengingatkan bahawa kita semua menerima amanah berat daripada Allah **سُبْحَانَهُ وَتَعَالَى**.

Firman Allah dalam surah Al-Anfal ayat 27:

يَا أَيُّهَا الَّذِينَ ءَامَنُوا لَا تَخُونُوا اللَّهَ وَالرَّسُولَ وَتَخُونُوا أَمْنَتَكُمْ وَأَنْتُمْ تَعْلَمُونَ ﴿٢٧﴾

Maksudnya: “Wahai orang yang beriman, janganlah kamu mengkhianati (amanah) Allah dan Rasul-Nya serta janganlah kamu mengkhianati amanah-amanah kamu, sedang kamu mengetahui (salahnya).”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Ogos

(Bagi Bacaan pada 4 Ogos 2023 bertemakan “Belia”)

2023M/ 14445H

الْحَمْدُ لِلَّهِ عَلَى الْآلَاءِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِحُجَّتِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعَلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾
[الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نَبِيِّ الْبَشَرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Di kesempatan ini, khatib ingin menyentuh tentang belia. Belia, adalah generasi yang amat penting dan merupakan aset bernilai serta berperanan dalam memacu pembangunan negara. Di dalam Surah al-Kahfi ayat 13 yang bermaksud:



“Kami ceritakan kisah mereka kepadamu (wahai Muhammad) dengan sebenarnya. Sesungguhnya mereka itu ialah pemuda-pemuda yang beriman dengan Tuhan mereka dan Kami tambahkan kepada mereka hidayah petunjuk.”

Memasuki era cabaran baharu dunia moden kini khususnya Revolusi Industri 4.0, para belia harus menyedari bahawa perkembangan teknologi seperti *Artificial Intelligence (AI)*, kemajuan *internet of things (IoT)* dan penggunaan robotik sedang mengambil alih sebahagian peranan manusia. Oleh yang demikian, generasi belia perlu bersiap sedia menghadapinya dengan menerokai pelbagai disiplin ilmu, mempelajari kemahiran yang sesuai dengan kehendak semasa dan bersikap positif terhadap perubahan zaman. Belia juga sewajarnya memperkukuhkan iman dan taqwa serta memiliki jati diri sebagai seorang mukmin sejati, agar tidak hanyut dalam kelekakan sehingga tergelincir dari petunjuk agama.

Dalam usaha memperkasakan golongan belia, kerajaan telah menyediakan sejumlah peruntukan melalui Majlis Belia Malaysia (MBM), pembangunan Rumah Belia Madani (RBM) di ibu negara dalam tempoh lima tahun dan rancangan pembangunan Rumah Mampu Milik (RMM). Selain itu, turut diperkenalkan Kredit *e-Tunai* Belia Rahmah, penangguhan bayaran PTPTN serta menyalurkan pembiayaan yuran ujian memandu untuk belia daripada kumpulan isi rumah B40.

Kesemua usaha ini adalah bagi memantapkan kekuatan intelektual, emosi dan spiritual para belia negara sebagai persediaan menjadikan mereka pewaris kepimpinan negara yang unggul di masa hadapan.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Al-Sultan Abdullah Ri'ayatuddin Al-Mustafa Billah Shah Ibni
Almarhum Sultan Haji Ahmad Shah Al-Musta'in Billah dan Kebawah Duli
Yang Maha Mulia Seri Paduka Baginda Raja Permaisuri Agong, Tunku
Azizah Aminah Maimunah Iskandariah Binti Almarhum Al-Mutawakkil
Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul
Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرِّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً
يَا رَبَّ الْعَالَمِينَ.

*Ya Allah! Dengan sifat-Mu yang Maha Pemurah dan Maha Mendengar,
jadikanlah kami dan keturunan kami orang-orang yang istiqamah
mendirikan solat secara berjemaah serta mengeluarkan zakat dan
melaksanakan waqaf melalui agensi milik penuh Majlis Agama Islam
Negeri Pulau Pinang (MAINPP) iaitu Zakat Pulau Pinang (ZPP) dan Wakaf
Pulau Pinang (WPP).*

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٧﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ
عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٨﴾